

Is Surat Ni Epustul Pablo Ziyà Te Menge TigKulusas

Is Mehitenged te Surat he Para te Menge TigKulusas

Nehimanan kew te para te untung niw tenged te kebpekidsevaha niw ki Kristu. Iyan heini ibpesavut ni Pablo hein mibpesuratan din is menge tumutuu ziyà te Kulusas. Kinahanglan he egketuenan dan heeyan su mezakel is edsupak kenian he ketudluan.

Is duma egkagi te kenè pa ereg is kedserigi ki Jesus. Ke sikandan te utew kinahanglan is kebpezizalem te menge sugù wey te zuma he menge tulumanen he imbegey te Megbevayà pinaagi ki Moises dengan, wey te zuma pa he menge tulumanen he midhimu te etew. Iyan, migkagi si Pablo te, “Lavew si Kristu te langun he vineelan wey minsan te mezakel he kelasi te menge mulin-ulin he zuen dan kegehew wey gehew.” Migkagi pa zaan sikandin te, “Is langun he menge sugù te menge Hudiyu ne alung dà te ebperetengen dan.” Piru iyan tutuu is: neume en sikan is ebperetengen dan, su nekeume en si Kristu. Umba iyan tew sikandin edsilbiyan.

Is duma, iyan kandan he penurù is: kenè kun tutuu he Megbevayà si Jesus. Piru sumalà is impesavut ni Pablo, “Iyan suat te Megbevayà is: langun he kekemegbevayè din ne ziyà daan te anak din he si Jesu Kristu.” Umbe minsan hengkey he ebeelan ta, kinahanglan he iyan ta ibpéhuna si Kristu, su is tumutuu ki Kristu, wazè din en kebpekidepità te kelibutanen he menge vutang su sakup en sikandin diyà te langit.

Inragkes ni Pablo kayi te surat din is menge sugù para mebmelipayen is pemilya. Duen menge sugù he para te menge esawa he vahi, menge esawa he maama, menge anak wey menge ginikanan wey elin daan is menge suluguen wey is menge egalen dan.

1 ¹ Siak si Pablo wey heini is suled tew he si Timoteo, ebpengemusta key keniyu ziyàn. Epustul a; midsugù a ni Jesu Kristu su iyan egkesuatan te Megbevayà.

²Ebpsuratan ku sikiyu is minge gaked te Megbevayà diyan te inged he Kulusas he minge metinumanen te lalag ni Kristu.

Berakat he ikegagew kew te Amey tew he Megbevayà wey vegayi kew zin te melinawen he kebpesavuk.

Is Ampù ni Pablo

³Sikami, emun id-ampù dey sikiyu, layun key ebpeleemat diyà te Megbevayà he Amey te Nengazen tew he si Jesus tenged keniyu, ⁴su nezing dey is tudtul he mezesen is kedtuu niw ki Jesu Kristu wey zekelà layun is gagew niw te minsan hentei he etew he gaked te Megbevayà.

⁵Umba mezesen is kedtuu niw wey zekelà is gagew niw su kenà egkeawà is perateng niw te langun diyà te langit he integana keniyu te Megbevayà. Nezing niw heini zutun te kebpesevuta keniyu te tutuu he penurù he iyan is Meupiya he Tudtulanen. ⁶Heini is migkagi he Meupiya he Tudtulanen, pinaagi te kedtuu kayi, mezakel en he minge etew ziyà te minsan hendei he inged is mibmeupiya is minge ulaula zan. Ne kenà duen dà taman su ed-iseg ebmezakel is minge tumutuu pinaagi te Meupiya he Tudtulanen, iring te layun daan ed-iseg ebmezakel is minge tumutuu ziyàn te keniyu puun pa zutun te andew zengan he nezing niw is tudtul te gagew kenitew te Megbevayà wey netuenan niw he venar iyan. ⁷Impenurù keniyu heini ni Ipapas he minahal he zuma zey he suluguen ni Kristu. Metinumanen sikandin te minge sugù ni Kristu pinaagi te kedtavang din kenami. ⁸Midtudtul zin kenami he zekelà is gagew niw te minge zuma tew he tumutuu tenged te mid-ulinan kew te Wagas he Mulin-ulin.

⁹Ne tenged kayi ibpenigudu zey sikiyu id-ampù puun pa zutun te andew zengan he nezing dey is tudtul mehitenged te kedtuu niw. Layun dey id-ampù diyà te Megbevayà he vegayi kew zin te kegkesayud te langun he ulaula he ebpevelan din keniyu, he ke và dà egkegiya, mehimu kew zin he mebmetau ne pinaagi te Wagas he Mulin-ulin, ivegey zin keniyu is kegketuusi te meupiya wey mezaat. ¹⁰Su emun ebeelan din is iring kayi, ne human egkehimu is minge ulaula niw he zait he minge ulaula te minge etew he negaked te Nengazen tew, ne egkehimu zaan he layun niw egkeveeli is egkesuatan din; layun niw egkeulaula is minsan hengkey he minge meupiya he ulaula. Ne layun daan ed-iseg is kegketueni niw te minge ulaula te Megbevayà. ¹¹Ne ibegey zin keniyu is dekelà he gehem he ebpuun te zekelà he gehem din, ne tenged kayi te gehem layun niw egkeantus is kemeregenan he zekelà is kelipey niw. ¹²Ne kenà duen dà taman su zekelà dutun is kebpesleemat niw te Amey tew he Megbevayà tenged te kedhimuwa zin keniyu he zait he mekeambit kew zutun te langun he ibegey zin diyà te keniyu te minge gaked din he midteyawan is isip dan. ¹³Midteyangan kiw te Amey tew he Megbevayà ne tenged kayi wazè kiw en maan meveyveyai te kerusireman, *he ke và dà*

egkegiya, si Setanas. Ne guntaan iyan en ebayàbayà kenitew is Anak te Megbeveyà he si Jesus he utew mahal ziyà te gehinawa te Megbeveyà. ¹⁴Ne pinaagi kayi te Anak din, nevelukasan kiw zin te kegkeuripen kenitew ni Setanas ne mibpesaylu kiw zin te menge ulaula tew he mezaat.

Is Tutuu Mehitenged ki Kristu

¹⁵Heini is Anak te Megbeveyà, ne iyan kebpegawagawa te kenà egkeahà he Megbeveyà. Is Anak, ne lavew sikandin te minsan hengkey he linimbag din ¹⁶su pinaagi kandin te Anak te Megbeveyà midlimbag te Megbeveyà is minsan hengkey ziyà te langit wey zini te tanà, sikan is egkeahà te etew wey is kenà egkengeahà he kedesenan he zuen dan kegehém, wey kebayaàbayà, wey kedhadì. Is Anak, mibpeveelan kandin te Amey zin he Megbeveyà is minsan hengkey su wey zin megamit heini is minsan hengkey he linimbag din. ¹⁷Ne elin daan ketezengan ke maan is lavew is Anak te Megbeveyà su tenged te zaan en sikandin te wazè pa limbaga is minsan hengkey, wey pinaagi kandin is hustu he kebpekesavuk wey egkengeulaula te langun he linimbag. ¹⁸Wey tenged te iyan sikandin ebayàbayà te lawa zin, he ke và dà egkegiya, is langun he menge tumutuu kandin, wey tenged daan te iyan sikandin ebegey te untung diyà te langun he menge tumutuu su iyan sikandin lavew te langun he egkengevanhew ne tenged kayi iyan sikandin lavew te minsan hengkey. ¹⁹Ne egkesuatan te Amey tew he Megbeveyà he ke hengkey sikandin, iyan ded daan sikan is Anak din. ²⁰Ne egkesuatan din daan he pinaagi te Anak din meked-uliey te meupiya he kedepità sikandin wey is minsan hentei zini te tanà wey ziyà te langit. Ne pinaagi te kedtigis duen te lengesa te Anak din diyà te krus egkehimu he menge emigu zin is minsan hentei.

²¹Kenè kew zengan menge emigu te Megbeveyà, kekenà, menge kuntada kew zin su layun mezaat is menge isip niw wey ulaula niw. ²²Ne minsan pa te iyan haazà, midhimu kew guntaan te Megbeveyà he menge emigu zin pinaagi te kebpatèy ni Kristu. Umba mibpehimatey si Kristu su wey kew mehimu he menge etew he wazà mezaat he ulaula ne wazà igkesumbunga keniyu keuzemà emun ibpeetuvang kew zin diyà te Amey zin he Megbeveyà. ²³Iyan, kinahanglan he kenè niw engkezi is kedtuu te tutuu he tuluuwen, kekenà, ligeni niw is kedtuu niw ne kenè kew medarà is ebpaabut te langun he impenaad te Megbeveyà he nezineg niw zengan hein impenurù keniyu is Meupiya he Tudtulanen. Heini is nekagi he Meupiya he Tudtulanen, ne insangyew ziyà te menge etew ziyà te minsan hendei. Siak si Pablo, midsugù a wey ku ikesangyew is Meupiya he Tudtulanen.

Is Baal ni Pablo

²⁴Maambe ke ebpekeantus a guntaan te merasey su iyan igkezeyzey niw. Igelipey ku heini su iring te kegkerasey ni Kristu edhimesazan

ku en is langun he meregen he ibpaantus din kediey su wey mezeyzey is lawa ni Kristu, he ke wà dà egkegiya, is minge tumutuu kandin. ²⁵Nehimu a he suluguen wey a meketavang te minge tumutuu. Ne umba mibpili a te Megbevayà su wey ku sikiyu metevangi is minge etew he kenà Huidiyu ne wey ku ikepurung ikepenudtul is Lalag te Megbevayà. ²⁶Ne zengan, heini is Lalag, ne in-eles te Megbevayà ne wazà ipezayag diyà te minge etew, iyan, guntaan ibpezayag din en kenitew te minge tumutuu kandin ²⁷su egkesuatan din he sikitew is minge gaked din, ne egkesayud kiw ke hengkey is utew lavew he meupiya he edhimuwen din diyà te langun he minge etew. Ibpesayud din en kenitew he edlumunan kiw ni Kristu ne tenged kayi egketuenan tew he edtulusen kiw keuzemà. ²⁸Sikami, idsangyew zey si Kristu; edleguyan dey is minsan hentei, wey ebpenurù key kandan ebpurung sumalà is egkehimu zey he ketau su wey meketuu is langun ki Kristu, ne wey sikandan keuzemà ikepeetuvang diyà te Megbevayà he wazà kurang te kedtuu zan. ²⁹Siak, ebpenigudu a ebaal he edlig-enan te zekelà he zeseni ni Kristu su wey metuman heini.

2 ¹Umba egkegiyen ku heini su egkesuatan ku he metueni niw ke maan is ebpenigudu a edhagù tenged keniyu wey tenged daan te minge tumutuu ziyà te inged he Leudisiya wey is minsan hentei he tumutuu ziyen he iring keniyu wazè pa mekekilala kedì. ²Iyan idhagù ku su wey melig-eni is kedtuu niw te Megbevayà pinaagi te kegkeupakat niw wey pinaagi te kebmahala niw te uman sevaha keniyu. Egkesuatan ku he meheget is kegkesavut niw te impenurù keniyu he iyan kes impezayag te Megbevayà keniyu mehitenged ki Kristu. ³Su iyan dà sikandin ebpekevegey te minsan hengkey he tutuu he ketau wey tutuu he kedsavut.

⁴Egkegiyen ku heini su wey wazà mekekabig keniyu he minsan hentei pinaagi te minge ketezengan he henduen be te hustu, iyan, tarù. ⁵Su minsan te wazà a guntaan diyan te keniyu, layun ku sikiyu ed-isipa. Igelipey ku sikiyu su netuenan ku he mibpurungan niw te ed-ulaula is meupiya he ulaula wey melig-en daan is kedtuu niw ki Kristu.

Is Kelibriyanan Pinaagi te Kebpekidsevaha Tew ki Jesu Kristu

⁶Ne geina te midawat niw si Jesu Kristu he Nengazen niw kinahanglan he is minge ulaula niw, ne zait te upakat niw kandin. ⁷Purung kew pendalid diyà te kandin; purungi niw istudyuwi is minge ulaula zin; purungi niw tuuwi sikan is tutuu he tuluuwen he impenurù keniyu. Ne kinahanglan he layun niw peselemati te Megbevayà is gagew zin keniyu.

⁸Andam kew su kela ke zuen egkabig keniyu pinaagi te kebpenurù te tuluuwen he tarù ne wazè din pulus su imbilinbilin dà te minge etew. Kenà haazà hustu he tuluuwen su kenà ebpuun diyà te ki Kristu. ⁹Umba egkegiyen ku heini su si Kristu, nehimu sikandin he etew. Duen din lawa,

iyang, minsan pa kayi is minsan hengkey he ziyà te Megbevayà ne ziyà te kandin. ¹⁰Ne sikiyu zaan, pinaagi te kebpekidsevaha niw ki Kristu, nekepurung kew en mekeazen te untung he imbegey keniyu ni Kristu. Ne iyan si Kristu sikan is edhadì te minsan hentei he kedesenan he zuen din kegehém wey kebayaàbaya.

¹¹Ne tenged kayi, minsan kenè kew minge Hudiyu, is midhimu keniyu te Megbevayà, ne iring duen te kedsirkunsidara zengan te minge Hudiyu su nehimu kew en he minge gaked te Megbevayà pinaagi te kebpekidsevaha niw ki Kristu. Iyan, selakew heini, su kenà pinaagi te kebpeleei te lawa zà duen, kekenà, in-awà ni Kristu is gehém te mezaat he kebaya te lawa niw. ¹²Ne tenged kayi inleveng kew zuma kandin dutun te kebewtismuwi keniyu, ne nevanhew kew zaan duma kandin su nekidsevaha kew kandin tenged te midtuuwan niw he mekegegehém is Megbevayà. Iyan sikandin sikan is mibanhew ki Kristu. ¹³Ne sikiyu, wazè niw pa zengan untung he wazè din pidtemanan tenged te memezaat is minge ulaula niw te kenà minge Hudiyu wey tenged te midtuman niw is memezaat he kebaya te lawa niw. Ne minsan pa zutun, mibegayan kew te Megbevayà te untung he wazè din pidtemanan ne nevanhew kew en duma ki Kristu. Mibpesaylu kiw te Megbevayà te langun he minge salè tew. ¹⁴Ne minsan pa te wazè kiw medtuman te insurat he kesuguan din, pinaagi te kebpatay ni Kristu ziyà te krus, in-awè din is kesuguan ne tenged kayi wazè en igkesiluti zin kenitew. ¹⁵Ne haazà is minge kedesenan he mezaat he mulin-ulin he zuen dan kegehém te kebayaàbaya, in-awà te Megbevayà is kegehém dan, ne pinaagi te kedsulituwa zin kandan pinaagi te kebpatay ni Kristu ziyà te krus, impeehè din he wazè dan en kebpekesukul.

¹⁶Umba, minge suled, kenè niw itetenged is edsudì keniyu emun kenè niw ebpezumdumahan is egkesuatan dan he ibpeulaula keniyu mehitenged te kegkaan wey ked-inum, wey mehitenged daan te kedsilibra te minge mahal he minge andew wey kedsilibra te intrada te hayag wey minge andew te kedhimeley. ¹⁷Su is minge iring dutun, ne nehimu zengan he alung dà. Ne ziyè pa te huziyan is tegialung dutun he iyan si Kristu. ¹⁸Duen daan minge etew he egkagi he lavew sikandan tenged te zuen kun minge egkein-inuwan he impaahà kandan wey tenged te kenè dan mepelevawen. Ne ibpenurù dan he kinahanglan he ebpekezap ki te minge velinsuguen te Megbevayà ziyà te langit. Kenè niw, minge suled, itetenged is kedsudì dan keniyu su is iring dutun he etew, ne ebpezalig dà, iyan, wazà hustu he ketezengan te kebpezalig dan su iyan ebayaàbaya te isip dan is kelibutanen he kebaya dan. ¹⁹Ne wazè dan en upakat ki Kristu he iyan ed-uwit kenitew. Iyan si Kristu puunà te zesen te kedtuu tew ne pinaagi kandin ed-iseg is kezesen te upakat tew te langun he tumutuu sumalà is egkesuatan te Megbevayà, iring te lawa tew, ne ed-

iseg daan is desen din ne kenè ebpekedsusuwey pinaagi te kegkevagkes kayi zutun te minge ugat din.

²⁰⁻²²Na, minge suled, geina te iring te minatey ki en duma ki Kristu, wey kenè ki en maan egkeveyveyaan te minge kenà hustu he tuluuwen, kinahanglan he kenè kew en maan mebpemineg te minge sugù te minge etew he minge kuntada te Megbevayà. Minge sugù heini te minge etew zà duen. Egkagi zan he zuen minge egkeenen he kenà ibpekaan kenitew te Megbevayà, ne minsan is kegezami wey is kegewezi zà kayi ne wazè din kun itugut kenitew. Kenè niw, minge suled, peminenga is iring dutun su wazà pulus te idawey zan su emun egkeenen tew is egkeenen ne egkeawà heini. ²³Haazà is minge etew, henduen be te hustu is ibpenurù dan. Egkagi zan he kinahanglan he ed-ezapan ta is minge velinsuguen te Megbevayà, wey kinahanglan he ebminusen ta is pid-etawan ta wey kinahanglan daan he edresayen ta is lawa ta. Ne minsan pa kayi, kenà hustu heini is ibpenurù dan su is minge sugù he iring kayi, ne kenà heini ebpeketavang kenita te kedsukul te mezaat he kebayà te lawa ta.

Is Daan wey Vegu he Kineiya

3 ¹Ne, minge suled, nevanhew si Kristu ne iring te nevanhew kiw zaan duma kandin su zuen tew en untung he wazè din pidteman. Ne tenged kayi, kinahanglan he ebpurungan ta layun ed-isipa is ibpeisip-isip kenita te Megbevayà diyà te langit he zutun edhadì si Kristu he ebpinuu ziyà te zapit te egkekewanan te Megbevayà. ²Ed-isipen ta layun heini ne kenè te en ed-isipen is minge mezaat he ulaula zini te tanà. ³Umba egkegiyen ku heini su sikita is tumutuu, minatey ki en duma ki Kristu ne is tutuu he untung ta pinaagi kandin, wazè pa heini ipezayag te Megbevayà. ⁴Umba, minge suled, emun edlikù dini si Kristu he iyan puunà te vegu he untung ta, ibpegawagawa is kekempet din ne ibpegawagawa zaan dutun is kekempet te kenita he vegu he untung su zutun duma ki kandin.

⁵Umba, minge suled, kenè niw en itugut he tumana niw is mezaat he kebayè niw; kenè niw ul-ulaha is mahawag wey meremerik he ulaula ne kenè niw mehimuwa he zuen suat niw te kenè niw esawa; engkezi niw is mezaat he ulaula wey is kekeleged su emun legezen ki te minge azen, henduen be te egkeilisan dini te gehinawa ta is tutuu he Megbevayà te minge azen. ⁶Ne siguradu edsilutan te Megbevayà is minge etew he kenà ebpmineg su layun dan ed-ulaula te minge iring kayi. ⁷Ne iring kayi zaan is mid-ulaula niw zengan su zutun layun mezaat is minge ulaula niw.

⁸Ne guntaan, kinahanglan he ed-iniyugan ta is minsan hengkey he mezaat he ulaula iring te kegkepauk wey kebpekigkuntada te zuma he etew, is kebpesipala, is ked-ituk wey is meremerik he kegkagi. ⁹Kenè

ki edtarùtarù su nelibri ki en te zaan he kegkeetew ta wey te minge mezaat he vaal he mid-ulaula ta zengan te kedtumana ta te minge zaan he suat ta. ¹⁰Ne guntaan midhimu ki en te Megbevayà he vegu en he etew he edhimuwen din he iring te kandin. Umba midhimu ki zin he vegu su wey ta mepurung mesavut ke hentei sikandin. ¹¹Ne tenged kayi, sikita is midhimu zin he vegu he etew, wazè ta zapit ibpelavi te etew he Hudiyu wey te etew he kenà Hudiyu su neked-iiring diyà te Megbevayà is nesirkunsidar wey is wazà mesirkunsidar; neked-iiring daan diyà te kandin is neketunghà wey is wazà meketunghà, is suluguen wey is egalen. Dini te kenitew te minge vegu he etew, iyan dà lavew si Kristu ne midlumunan ni Kristu is kada sevaha kenitew.

¹²Ne, minge suled, geina te mibpili kiw te Megbevayà, ne midhimu kiw zin he minge gaked din, wey geina te mahal kiw ziyà te gehinawa zin, kinahanglan he zekelà is hizu ta wey gagew ta ziyà te minsan hentei. Ebpurungan ta is minge zuma ta ne kenè ki ebpelavew. Kinahanglan he mepelevayen ki layun. ¹³Ed-entusen ta, ne ebpeseyluwen ta is minge zuma ta he ebpekesupak kenita. Kinahanglan he iring te mibpesaylu kiw te Nengazen tew ebpepeseyluwè kiw zaan. ¹⁴Kinahanglan he mahal ziyà te gehinawa te kada sevaha is minsan hentei he zuma zin. Iyan heini lavew te langun he sambag ku keniyu su emun egketuman niw heini egkehimu niw zaan is langun kayi te minge meupiya he ulaula. ¹⁵Ne kinahanglan daan, he iyan niw ipelavi ziyà te gehinawa niw is kelinew he ibegey ni Kristu su umba midhimu kiw he tumutuu te Megbevayà su wey kiw mebmelinawen su nesevaha kiw is minge tumutuu. Ne layun niw peselemati te Megbevayà is gagew zin keniyu. ¹⁶Minge suled, layun niw zewata is impesavut ni Kristu. Pepempenuruey kew wey mebpesemsembagè kew sumalà is ketau te kada sevaha. Kanta kew te minge idalig te Megbevayà, wey minge Salmo, wey elin daan is minge kentahan he ibpinted keniyu te Wagas he Mulin-ulin. Kentahi niw is Megbevayà he utew zekelà is kebpelemati niw kandin. ¹⁷Ne minsan hengkey he egkegiyen niw wey ed-ul-ulahan niw, kinahanglan he zait heini he ulaula te suluguen te Nengazen tew he si Jesus. Ne kinahanglan daan he layun dekelà is kebpelemati niw te Amey tew he Megbevayà pinaagi te kebpekidsevaha niw ki Jesus.

Is Minge Sambag Diyà te Minge Tumutuu

¹⁸Sikiyu is minge vahi, pevayàbayà kew te esawa niw su iyan heini hustu he ulaula te vahi he tumutuu te Nengazen.

¹⁹Ne sikiyu zaan is minge maama, mahala niw is esawa niw; kenè niw sikandan henghenggeri.

²⁰Sikiyu is minge vatà he tumutuu te Nengazen, peminega niw layun is minge sugù te ginikanaan niw su utew heini egkesuati te Megbevayà.

²¹Ne sikiyu zaan is menge ginikanan, kinahanglan he kenà utew subra is kedsewaya niw te menge anak niw su kela ke maawà diyà te kandan is gustu zan te ked-ulaula te hustu.

²²Ne sikiyu is suluguen, layun niw peminega is sugù te egalen niw te minsan keenu he timpu, ne kenà dutun dà te timpu he ebentayan kew zin. Ne kenè niw iyan dà ibpemiega kandin su wey meupiya is isip din keniyu, kekenà, kinahanglan he iyan ketezengan ke maan is ebpurangan niw is baal niw su geina te zekelà is kedtahud niw te Nengazen tew. ²³Ne minsan hengkey is ebpevelan keniyu, ne purungi niw su iyan edsusi keniyu is Nengazen ne kenà iyan dà haazà is kelibutanen he egalen niw, ²⁴su netuenan niw en he edsuhulan kew keuzemà te Nengazen. Ne ibegey zin keniyu haazà is suhul he impenaad din su is tutuu he egalen niw ne iyan si Kristu. ²⁵Su sikan is etew he ed-ulaula te mezaat, ne edsilutan sikandin sumalà is kevegat te salè din su wazà ibpelavi te Megbevayà te minsan hentei.

4 ¹Ne sikiyu zaan is duen din uripen, purungi niw is kedumala niw te menge uripen niw ne ivegey niw kandan is metazeng wey hustu he ibegey ne kenè niw lipati he zuen daan tegiuripen keniyu ziyà te langit.

²Ne sikiyu is langun, pekehamen kew ampù ne purungi niw is ked-isip niw ke ed-ampù kew wey layun niw peselemati te Megbevayà is gagew zin keniyu. ³Ne emun ed-ampù kew, iampù key zaan keniyu. Ampù kew he himuwa te Megbevayà is paagi wey key mekesangyew te in-eles dengan he lalag din mehitenged ki Kristu. Umba zini a guntaan te pirusuan su insangyew ku heini is lalag. ⁴Ampù kew zaan he metevangi a te Megbevayà wey ku ikepesavut heini is lalag te hustu he paagi.

⁵Purungi niw, menge suled, te minsan keenu he timpu is ulaula niw ziyà te menge etew he wazè pa medtuu ki Kristu su wey meketuu sikandan te Lalag te Megbevayà. ⁶Kinahanglan he layun ibmeupiya te gehinawa te menge etew is menge lalag niw kandan ne kinahanglan daan he iyan niw kegiya kandan is menge lalag he zuen din pulus ne emun ed-ul-ulahan niw heini, ne egketuenan niw ke hengkey is hustu he ketezengan he idtavak diyà te kada sevaha he etew.

Menge Pengemusta

⁷Is langun he nengehitavù kedì dini, ne egketuenan niw ziyà te ki Tikiku te sevaha he suled tew he utew minahal. Duma zey sikandin he suluguen te Nengazen he utew metinumanen te ebpevelan kandin te Megbevayà. ⁸Edsuguen ku sikandin diyan te keniyu su wey niw metueni ke hengkey is kebpekesavuk dey ne wey zaan maawà is ebpekesamuk te gehinawa niw tenged kenami. ⁹Iyan duma ni Tikiku, si Unisimu, is sevaha zaan he suled tew he metinumanen daan te menge sugù te Nengazen. Minahal zey zaan sikandin. Duma niw si Unisimu he tigKulusas. Edtutulan kew zan te langun he neulaula zini.

¹⁰Ebpengemusta keniyu si Eristarku he zuma ku he pirisu. Si Marcos, is id-agem ni Bernabe, ne ebpengemusta zaan keniyu. Gelgelawa niw sikandin emun ebpekeuma ziyàn. Netuenan niw en is intelaan ku keniyu mehitedged kandin. ¹¹Ne elin daan ebpengemusta keniyu si Jesu he eggezanan daan ki Hustu. Heini is tetelu, si Eristarku, si Marcos wey si Hustu, ne iyan dà sikandan menge Hudiyu he zuma ku kayi te kedsengyawa ku te kedhadì te Megbevayà. Ingkelipey sikandan te gehinawa ku.

¹²Ebpengemusta zaan keniyu si Ipapas. Duma niw zaan he tigKulusas he suluguen ni Jesu Kristu. Layun kew zin id-ampù. Ed-ampù sikandin diyà te Megbevayà he mebmelig-en wey meheget is kedtuu niw ne wey meheget daan is kedtumana niw te egkesuatan te Megbevayà. ¹³Iyan igkekegiya ku kayi ziyàn te keniyu su egkesuatan ku he metueni niw he zekelà is kedhagù ni Ipapas wey kew mezeyzey ne kenà iyan kew zà, kekenà, ragkes daan is menge tumutuu ziyà te inged he Leudisiya wey ziyà te inged he Hirepulis. ¹⁴Si Lucas, is minahal tew he duktur, ne ebpengemusta zaan keniyu wey si Dimas.

¹⁵Ipengemusta key zaan te menge suled tew ziyà te inged he Leudisiya. Si Nimpa zaan wey is menge tumutuu he ziyà edsimba te valey zin, ebpengemusta key zaan kandan. ¹⁶Emun egkepasad niw is kebasa kayi ziyà te menge tumutuu ziyàn, ne ipevasa niw zaan heini ziyà te menge tumutuu ziyà te Leudisiya. Ne sikan daan is surat ku ziyà te menge tigLeudisiya, sembayi niw ziyà te kandan wey niw mevasa. ¹⁷Kegiya niw ki Erkipu he purungi zin beeli is ebpeveelan kandin te Nengazen su suluguen sikandin te Megbevayà.

¹⁸Siak si Pablo, ebpengemusta a keniyu. Tuus heini is kedsurata ku te ngazan ku he kediey he surat heini. Kenè niw lipati he pirisu a ne iampù a keniyu. Berakat he ikegagew kew te Megbevayà.